

MyKid bukan dokumen wajib yang diperlukan – JPN

03 Oktober 2023, 5:42pm

SUNGAI PETANI: Kad MyKid yang dikeluarkan Jabatan Pendaftaran Negara (JPN) kepada kanak-kanak berusia bawah 12 tahun di negara ini bukan dokumen wajib yang diperlukan.

Sejumlah 160,000 permohonan MyKid diproses JPN sejak 2021, dengan kira-kira 40,000 dokumen itu sudah diserahkan bergantung kepada bekalan mikrocip.

Ketua Pengarah Pendaftaran Negara, Zamri Misma, berkata bagaimanapun waris yang belum menerima MyKid tidak perlu bimbang dengan ketiadaannya kerana memiliki dokumen itu bukan suatu kewajipan.

"Pertama saya nak jelaskan dahulu, Mykid bukan satu dokumen yang wajib perlu ada, paling penting perlu adalah Sijil Kelahiran yang dikeluarkan JPN.

"Mykid adalah dokumen tambahan, sebenarnya tak perlu bimbang, tak perlu risau, tak akan kena tangkap kalau tiada MyKid, tak ada masalah," katanya.

Beliau berkata demikian ketika ditemui selepas Sambutan Hari Jabatan Pendaftaran Negara Kali ke-75 di Masjid Darul Murthada di Kampung Telok, di sini, hari ini.

Sebelum ini media melaporkan mengenai rungutan waris yang masih belum menerima MyKid berikutan ketiadaan bekalan kad itu di seluruh negara.

Zamri berkata, biarpun MyKid bukan kewajipan, namun bagi mereka yang mempunyai keperluan mendesak mendapatkan dokumen itu boleh menghubungi pejabat JPN terdekat.